

甘泉鄉人稿

甘泉鄉人稿卷五

嘉興錢泰吉輔宜

校史記雜識

史記明刻本集解索隱正義皆備者以震澤王氏莆田

柯氏本爲善評林本

吳興凌稚隆刻

藏書家不以爲重今以乾

隆四年

殿本校勘乃知勝明監本多矣凡例言以宋

本與汪本

當卽柯本

詳對非虛語也梁曜北先生撰史記志

疑亦以湖本爲據暇當訪求王本柯本詳校之庚子秋

日記

道光二十年四月初十日至二十一年五月初八日依

武英殿校刊本謹校一過并謹錄 四庫全書考證
於簡端 殿本考證屬潘梧君藹人別錄全部 殿本
史記亦假自從子承志與漢書同

辛丑六月十九日始從杭州振綺堂汪氏假明莆田柯
氏本校至明年壬寅十月五日畢汪氏所藏柯本小米
舍人遠孫以單行本索隱校海昌吳子撰春照以金版
校惜兩君早世未能完備吳校所據金版多可從當訪
求詳校 吳校每稱元版然與中統本不相合當別是
一本

辛丑五月十三日以明震澤王氏本校集解序於杭州

螺子峰之法華寺 王氏本長興朱立齋廣文紫貴爲
余假得者卷尾索隱後序之後有王延喆刻書時跋然
四庫考證所引王本多不同疑全部與索隱後序非
出一本金岱峰云卷尾既有王氏跋且謂之王本以待
訪求別本審定可也岱峰與余同寓法華寺樓上看西
湖煙雨岱峰讀樊榭詩余校史記 文瀾閣正義從王
本出今以校所假王氏本多合汪氏所藏柯本以王本
校出者亦合則爲王本無疑矣 四庫考證所引有不
同者或王氏嘗脩改歟八月初八日記

延喆不敏嘗聞於先文恪公曰國語左傳經之翼也遷

史班書史之良也今吳中刻左傳郢中刻國語閩中刻漢書而史記尙未版行延喆因取舊藏宋刻史記重加校讐翻刻於家塾與三書並行於世工始嘉靖乙酉蜡月迄丁亥之三月林屋山人王延喆識於七十二峰深處朱立齋所假王本索隱後序後有此跋凡七行脫爛數字衍石兄自大梁寄所藏本與立齋所假同惜失後序不能校補此跋脫爛之字蓋書賈遇明人舊刻多去其刻書序跋以僞爲宋本令人莫可考究雖天祿琳琅所藏亦然朱氏本此跋幸未去也前人謂王本史記爲文恪所刻亦未見此跋爾壬寅十月五日記戊

申正月廿六日假朱述之明府緒曾新得王本補跋語
中缺字述之時權州印與予互假藏書昕夕往還甚樂
也述之明府所藏王本目錄後有篆書震澤王氏刻
梓六字木記前所見兩本俱已割去獨此幸存余校
柯本與殿本及評林本異同處以王本參校於王本
尙未能字字對勘也

小題在上大題在下柯王兩本皆然然柯本大題旁注
不若王本並作大字尤爲近古重刻此書卷前後當從
王本

戊申三月五日書估持柯本來索隱序後有紹興三年

四月十二日右修職郎充提舉茶鹽司幹辦公事石公
憲發刊至四年十月三十日畢工三十八字凡三行始
知柯本從紹興本翻刻也竹汀翁語詳養新錄所見費懋中
序仍未見閱數日楊文學禮榮自吳門來言新得柯本
有費序柯序四月初錄寄費序爲嘉靖四年九月作大
略言陝西有翻刻宋版本江西有白鹿書院新刻本弗
可輒得余家近白鹿猶未購之自署金臺汪諒得舊本
重刻大行人柯君奇徵徧求諸家舊本參互考訂歷兩
載而始就白鹿本無正義陝西本雖有之而封禪河渠
平準三書特缺焉柯君悉爲增入云云柯序爲嘉靖六

年上元日 福建通志卷三十六正德十二年舒芬榜
進士柯維熊工部郎中

道光二十年七月朔至八月三日依 文瀾閣本校正
義一過時海鹽陳琴齋其泰司閣事爲請於鹽運使領
閣書至海昌踰月例所不許也琴齋徇余意求得之
辛丑十月廿九日校天官書至第三葉三十日至十一
月初八九北風怒號寒甚大雪五日至盈丈目所未覩
也與兒輩摩挲城闕所得古輒作詩爲消寒之課初九
日長至始有晴光呵凍仍以柯本校至十三日畢一卷
十九日聞世母金恭人有疾至家候安二十日傳聞餘

姚有警卽歸海昌十餘日來嚴寒不能握筆雪後屋漏藏書多沾溼此冊亦溼十二月初九日雨窗又以柯本校河渠書輟業幾兩旬矣此兩旬中呵凍跋唐碑十種屢聞風鶴之警聊藉古歡以散抑鬱耳十一日校平準書畢十八日聞尖山口有夷船城中室居多散杭州亦戒嚴欲向汪氏假柯本世家列傳不可得壬寅正月至四月以臨帖遣日并編次明許同生先生集四月十五日海氛益甚於愁坐無聊中洗滌古甌硯閒臨唐碑不能專心讀書也是月十八日夷船去乍浦五月中去上海旬日閒嘉興海昌人心稍安杭州亦弛警陳碩甫奚

從注氏檢寄柯本世家列傳六月十三日以後揮汗校
吳太伯世家然聞夷船自南而北且甬東尙竊據杞人
之憂殊未已也

泰吉三次校讀孔子世家皆在朔望辛丑七月十五日
長安鎮朱仲清芬示所得石刻吳道子畫大幅孔子像
因合舊藏小幅裝匣敬藏廟中壬寅六月下浣山東戊
卒請以聖蹟圖藏學宮七月朔亦謹藏於匣兩次校讀
皆得仰瞻先師遺像抑何幸也

辛丑壬寅冬春之交假拜經樓所藏元中統本欲校未
暇旋以海警懼失其本遂還吳氏癸卯秋日重借至學

舍自重九後十日校列傳至甲辰重五後五日畢中統
本非元印已多脫爛集解索隱細字校頗不易將校本
紀表書世家未能刻期也 此次校中統本參校毛刻
集解卽世所謂汲古閣本也 屈原傳分流汨兮集解
王逸曰湖本王逸誤正義校至數次始更正余之心粗
固可愧亦以見校字之難昔人謂如埽落葉信然甲辰
正月廿二日記 甲辰七月十七日以中統本校五帝
本紀畢入夏來督脩學宮少暇六月八日送試至省城
七月四日歸至今日始校完此卷所業已荒兩月矣
是本多脫爛寫補審是元刻有異乃箸之 乙巳二月

初十日以中統本校完夏本紀上年秋爲炳森應溥送鄉試九月炳森中式自是少暇日今年因學宮脩葺餘資延應笠湖明經時良管芷湘庭芬鍾署香繼芸曹杏庭錦堂潘稻孫詒穀諸茂才及予甥嘉善程淡如菊孫共纂州志將專力於志事抽暇校數紙不能速也 中統本表缺一至五鈔補不精六至十細字多漫漶目力難辨所校尙多率略 中統本每葉末行外上角標題篇名本紀以下皆然宋人刻書往往如此本紀并注某王至某王世家亦然田敬仲世家標題後齊世家未免臆造

自甲辰重五後校中統本列傳畢夏秋之交未暇校閱
乙巳春始抽閒校數紙按日記於卷尾十月二日始校
世家畢列傳已用毛本參校本紀至世家未暇也此後
欲專力海昌志稿校史須暫輟矣 自二十年四月始
校 殿本至此已六年矣訛字猶未盡正史公神妙之
處不能窺見萬一日月易邁徒勞無功如何如何 中
統本索隱大都與各本同與單刻本異可見合并刪節
自宋元已然索隱尙有單刻可校正義則訂正更難矣
卽如越世家夫椒一條單刻與合刻詳略不同無論
已單刻本作則椒山爲得合刻本作在椒山爲非大相

背戾矣。匈奴傳士力能彎弓。吳校本及單刻索隱作毋
弓。單刻索隱文與各本大異。合并者偶見正文作彎。不
知校正遂改索隱以牽合之。他處若此者不一而足。前
輩校史記若嘉定錢先生高郵王先生錢塘梁先生審
定正文足以嘉惠後學。而於集解索隱正義皆未暇專
力。後生未學欲從事於此。苦無博識之功。但能羅列各
本異同以待通人別擇也。然訪求善本亦非易事。吳子
撰言索隱有至元刻本子。撰旣沒無從問其何氏所藏
今所見但毛氏單刻爾。中統本有校理董浦序謂平
陽道參幕段君子成喜儲書求到索隱善本募工刊行。

索隱比之杭本多述贊一百三十篇注字幾十五萬言云云不及集解故吳氏書目竟題史記索隱然實兼有集解也猶避宋諱當是從宋本翻雕所謂杭本不知何人所刻

余舊有明北監本史記嫌其注文刪節以與沈雪門洛易汲古閣初印本後於吳山書肆得南監本爲吾鄉馮祭酒校刻視北監本稍詳然仍未全也故所校史記於明監本略焉馮公在南雍所刻三國志爲最善注文字大易於循覽余錄三國志校本乃陳明卿本所藏亦有馮本未暇校核戊申穀日記

索隱與集解毛氏兩單刻本往往有同文者疑合并分
析時未能審定之故索隱因集解而作不必全錄集解
之文又不若正義與索隱同時人所作或有偶合也今
既不能分別孰爲索隱孰爲集解凡遇同文且兩存以
俟攷定可耳中統本遇索隱與集解同者曰索隱文同
可以爲法

律書厯書天官書吾鄉王氏元啟有正譌嘉定錢氏塘
有釋疑當摘錄校正訛字各條

集解於封禪書今天子下云注解已在第十二卷今直
載徐義索隱正義亦與集解同詳於武紀各本皆然凌

氏必欲刪并武紀之注入封禪書遂多乖戾且有失錄之文後有重刻者宜正之

年表十卷正義不及數十條且自惠景閒侯者表以後竟無一字不應疏略若是正義單行本失傳已久無從考補矣惜哉 楚世家悼王二年三晉來伐楚至乘邛

而還正義曰年表云三晉公子伐我至乘邛四庫考證云公子

二字乘字俱誤誤也已解在年表中今年表無正義可見正義

之殘闕伍子胥列傳正義於姑蘇謂當作夫椒皆云解

在吳世家今本吳世家樛李但有集解姑蘇有集解有索隱夫椒有集解有索隱皆無正義太史公自序太史

公下正義云以桓譚之說釋在武本紀今武本紀亦未見皆缺失也

少時閱讀書敏求記心羨百衲史記恨不得見戊申初夏諸城劉燕庭方伯喜海言錢氏本爲朱竹君先生所得後藏其孫某翁處不輕示人方伯屢見之亦恨不能得後於廟市購彙集宋本每卷多有季滄葦名字印當是效遵王爲之者余乃借校一過自六月十日至十月廿九日畢己酉新正方伯奉召入都若遲數月則不能畢功矣亦天假之緣也彙集宋本凡四種記其大略於後

一本但有集解每葉二十八行行二十四字或二十五六七字不等注文每行三十一二字版心高約六寸闊約八寸敬字殷字避缺慎字不避當是南渡以前本

殷周本紀炮格今本皆作炮烙高郵王氏讀書雜誌詳辨之然未嘗言宋本作格則所見宋本亦與俗同也此本獨作格可謂一字千金矣孔子世家述三王之法王作五亦與各本不同惜多羈補兩三行之版每遇羈補處多訛字然瑕不掩瑜也

本紀六卷

五帝

秦夏

始皇

年表三卷

惠景間侯者

建元以來

王子侯

書四卷

禮律

樂世

歷世

楚

家二十五卷

吳太伯

齊太公

魯周公

晉

田敬仲

越王句踐

鄭趙魏韓

越	侯	侯	萬	劉	儋	魏	平	宗	孝	相	孔
主	石	敬	敬	敬	豹	豹	原	王	王	國	子
父	張	叔	叔	叔	彭	彭	君	三	五	曹	陳
朝	韓	孫	孫	孫	越	越	虞	王	王	參	涉
鮮	長	通	通	通	滕	滕	卿	列	列	傳	傳
南	孺	田	田	田	灌	灌	布	三	三	十七	十七
西	李	季	季	季	布	布	魏	卷	卷	卷	卷
南	尉	布	布	布	張	張	公	王	王	王	王
夷	佗	欒	欒	欒	淮	淮	子	剪	剪	剪	剪
	東	布	布	布	陰	陰	春	里	里	里	里
		倉	倉	倉	侯	侯	申	子	子	子	子
		公	公	公	鄺	鄺	君	甘	甘	甘	甘
		吳	吳	吳	生	生	信	茂	茂	茂	茂
		衛	衛	衛	陸	陸	少	荀	荀	荀	荀
		將	將	將	賈	賈	王	卿	卿	卿	卿
		軍	軍	軍	傳	傳	字	侯	侯	侯	侯
		驃	驃	驃	斬	斬	盧	孟	孟	孟	孟
		騎	騎	騎	荆	荆	純	嘗	嘗	嘗	嘗
					成	成	樂	白	白	白	白
					馮	馮	穀	起	起	起	起
					唐	唐	田	梁	梁	梁	梁
					安	安		蕭	蕭	蕭	蕭
					武	武					
					安	安					
					津	津					

一本亦但有集解每葉二十行每行正文十九字注文
 二十五字或二十六字版心高約六寸闊約八寸字大
 頗省目力惟十二諸侯年表紀年之字居中紀事之文
 兩旁分寫字大小同往往往眉目不分殊費循覽 卷中

桓字不避缺每葉中心有刻書人姓名中有郭敦不避
光宗嫌名當亦是北宋刻 天官書以下數卷紙墨俱

不及前疑是朱以後補版遇諱字亦不避版心閒有記

字數者亦前卷所無也 本紀三卷孝文 孝武 孝年表三

卷三代 十二國書四卷天官 封禪列傳九卷管子 晏

非諸侯 六國仲尼弟子司馬穰苴 孫子吳起 伍子胥

一本兼有集解索隱無述每葉二十四行行二十五字

或二十四字注文同高約五寸每半版闊約四寸索隱

以索隱曰三字標起上加圈 版心亦有刻書人姓名

恆字慎字避缺當是南宋本 本紀三卷項羽 呂后

列傳七卷

游俠
龜策

倭幸
貨殖

滑稽
日者
太史公自序

一本兼有集解索隱

贊
有述

每葉二十四行行二十二字

注文行二十八字高約五寸每半版闊約四寸秦楚之

際月表漢興以來諸侯年表卷尾有建安蔡夢弼傳卿

謹案京蜀諸本校理實梓於東塾二十字凡兩行與張

氏金吾愛日精廬藏書志所記合 殷元匡讓恆慎樹

多避缺惟衛康叔世家獨避貞字慎字 刺客列傳高

漸離索隱後有王義音子廉反六字王義爲正義之訛

可見當時雖但刻集解索隱而所見本已有兼刻正義

者故誤入此六字也

年表四卷

秦楚之際
漢興以來
諸侯
高祖功臣

漢興以來

將相名臣

世家五卷

燕召公衛康叔

管蔡朱微子

陳杞

列傳十

七卷

伯夷原賈生

廉頗藺相如呂不韋

田單刺客

李斯

魯仲連鄒陽

張耳

陳餘

司馬相如

儒林

淮南衡山

大宛

循

吏

汲鄭

儒林

酷吏

大宛

劉方伯所藏尚有集解索隱正義合刻本與柯本行款

同似是柯本所從出者卷末有校對宣德郎祕書省正

字張耒隸書本記與

天祿琳琅所記同

此本所刻與文潛同姓名

鈔

天祿琳琅傳本未作來

惜未及校

嘉定錢先生養新錄所記宋元槧史記三本吳氏所藏

中統本其一也余幸得校勘黃蕘圃藏三山蔡夢弼本

雖未見其全劉方伯本有二十六卷則亦得五分之一

矣惟顧抱冲藏澄江耿秉本則猶未見

吳門汪閏原宋元本書目有之

云鈔補不知卽顧氏本否

耿

昭文張氏金吾愛日精

本跋文錢氏三史拾遺錄之

廬藏書志所載宋元槧史記雖多殘本必有可觀聞皆歸他姓不知有緣得遇否高郵王先生嘗從吳中丞榮光借宋本記其略於讀書雜志云此吳氏荷屋所藏單刻集解宋本也其缺者以兼刻索隱本補之是以二本各存其半此之所有則彼之所無然皆係宋槧故可寶也惜不言何人所刻吳中丞下世後遺書亦不知若何矣王先生又引據明游明刻本亦所未見有志校史皆當訪求因詳記以俟己酉四月廿三日記

校集韻跋

二則

余於乙未秋假汪小米所錄嚴氏杰校宋本僅至上聲
二十六產止小米以說文釋文校亦止於此學使吳崧
甫少宗伯嘗見汲古閣影宋鈔本不能得乃與友人分
校一過甲辰八月學使假余所校兩漢書過錄余因借
校此本汲古閣影宋本嚴氏亦嘗見之故兩本所校略
同嚴氏未及者得備錄焉學使本有晉江陳侍御慶鏞
校語頗精核 四庫全書考證校勘此書極詳暇日錄
於簡端則訛字粗可是正矣

附錄二跋

邗上汪氏所藏宋本與汲古毛氏影鈔同毛本今藏
吳趨周漪塘所宋本此卷三十五葉每葉廿二行每
行口口字末葉十二行每葉版心之底皆有某人重
開重刊重刁字樣某人者刻工姓名也毛鈔遇訛書
處用白涂之加以墨筆每卷前後並有子晉圖書及
毛扆斧季小印

嚴厚民記於
平聲一後

凡曹缺處宋本皆完善而曹所據本與宋本時有不
同上聲十四賄宋本以梁益謂履曰屨六字綴於隧
字注曹本則無此六字而空白二寸弱蓋最初版當
大書屨字

嚴厚民謂當作屨
屨字誤泰吉附注

注云梁益謂履曰屨正

在曹空白處耳餘如十四泰糲剿籟殺兒貌剋各注
曹本皆缺賴此得以證之是真可寶哉

陳侍御記於卷尾

瑞安方雪齋教授成珪嘗校此書錄請崧甫學使序之
今從四明乞歸矣惜不及見其在海昌時假余所校史
記過錄未畢及至四明屬余錄校語以寄雪齋中年以
後亦喜校書曾校昌黎集及呂氏讀詩記用力頗勤老
尤矻矻不倦亦知交中所難得也已酉首夏識

附跋

集韻行世者惟曹氏揚州局刻爾警石師嘗錄段嚴
汪吳陳諸公所校影宋本於上下方又以紫色筆錄

四庫攷證而未迄事癸丑之秋命鴻畢錄之聞汲古閣影宋本爲吳晴舫學使所得欲仿刻未成平湖錢夢廬丈曾見同里丁氏有天一閣鈔本意必有出毛氏影宋之外者時地旣近倘蒐訪得之再校一過當益完善矣許丙鴻識

校佩觿字鑑跋

兩書余皆從吳兔牀翁過錄本錄佩觿爲翁覃溪先生錄瑞金羅有高臺山所校十之一二覃溪及丁君杰皆有跋桂馥未谷嘗取閱故眉閒亦有校語數條兔牀翁從丁君傳錄爲乾隆甲辰二月余所錄則道光戊戌八

月也羅君元本不知尙有傳否字鑑爲海昌錢布衣馥所校布衣篤學君子也余有擬傳在備志己酉初夏識

校陳后山集跋二則

后山詩余舊得任氏注本及武水陳氏本

陳唐刻四庫全書附存

目全集近始得雍正庚戌雲間趙氏鴻烈學稼山莊所刻二十四卷四庫著錄卽此本也夙聞拜經樓有過錄何義門校本因借校一過詩則參注本及陳氏本凡四十日而畢談叢理究詩話未見別本詞則陳刻有之不暇及也后山之文世鮮誦習者以故章善序送邢居實序各脫其半而誤合爲一篇先夫人行狀及光祿曾

公神道碑脫誤至數百字他文舛錯處篇篇有之非得
義門校補幾不可讀義門以嘉靖以前舊鈔本毛氏所
藏鈔本及舊鈔殘本校宏治己未南陽王懋學刊本拜
經樓本每卷有茶陵陳仁子同甫編校後學南陽王鴻
儒懋學重校後學彭城馬瞰廷震繡梓凡三行當卽從
義門所據本傳鈔惜鈔手及過錄尙未精審不知何日
更得舊刻一校耳丁未季冬

校此集未及半聞適許氏季女病亟急棹至吳門及歸
日校數葉以自遣廿年來校勘古籍大都爲定性之方
今則爲忘憂之草矣校旣畢炳森敬錄 四庫提要應

溥錄舊目及義門跋老妻爲易綫重裝若無季女之戚
亦冷齋樂事也

附錄三則

道光丁未十月廿六日新倉吳惺園明經昂駒寄到
拜經樓所藏舊鈔后山先生詩文集兔牀翁過錄何
義門校本次日合任注本武水陳氏唐刻本詩集校
對第一卷至十一葉是日風甚廿八日辰刻呵凍校
畢一卷各本詩俱如任注次序此獨分體以故合校
頗費翻尋忍寒作此生活自詫所得足償勞也

長至後二日校閱第八卷之半十七日聞適許氏季

女疾亟放棹吳門十九日午刻至珊林郡伯寓齋女
已於清晨死矣女曾讀小學孟子頗知禮法許氏以
爲賢婦年甫二十傷哉廿一日斂後忍淚而歸廿三
日晚至禾中省視世母金蒸人起居世母今年九十
六歲神明幸未衰也是役也兩兒侍廿六日適沈氏
長女耐廟兒曹畱與祥祭余不及待先一日歸學舍
廿七日校畢此卷我輩無絲竹陶寫正賴舊書以消
愁苦耳廿八日晨起記

十二月初五日校第十六卷是日老妻爲四女禮佛
余於雨窗聽禪誦校畢此卷愁懷一空矣

跋助字辨略

得此書二十餘年矣馮柳東嘗欲見奪未之付也今年
挾川蔣生沐見余曝書雜記中述此書假鈔其副爲重
裝見還因記己亥春仲

鄉先哲王先生元啟與胡書巢論脩濟甯州圖記書云
前見堂邑志中所論代編一款知爲有學有識之士近
代百年間少有能如此存心如此考究者因欲得此一
書閱之猥蒙卽以見贈云云見祇平居士集卷十七當
卽謂劉南泉淇所撰之志濟甯圖記祇平居士所脩者
不知刻否當訪求圖記及堂邑志則劉君之生平大略

可見

祇平居士濟甯州圖記稿本爲金岱峰所藏假余兩年矣戊申正月朱述之明府緒曾羅鏡泉廣文以智借鈔此書乃從圖記檢尋劉君事文僅附見於其弟汶傳中云淇字衛園工爲詩古文與汶同受知於

世宗當時有二難之目藝文志中亦僅錄衛園集及堂邑志衛園集不著卷數堂邑志二十卷錄其述例一條然則此書祇平居士亦未見其晦塞蓋已久矣

跋章氏宗源隋書經籍志考證

嘉慶戊寅吾兄衍石自京師歸篋中攜此書謂鈔自何

夢華元錫藏書家未有也余乃屬表兄懷豫堂鈔錄其副以期迫金岱峰屬其友相助謄寫逾月而畢惜僅有史部三十年來訪求全書無知之者道光丁未冬日朱述之明府假鈔一本乃從述之借孫氏五松園文集錄章君傳於冊首此書名與王氏漢書藝文志同而體例則異然纂輯古書實昉於王氏也

跋舊刻鮑氏注戰國策

宋姚宏校高誘戰國策注余所藏有雅雨堂本及吳門黃蕘圃仿宋本可互校矣鮑氏注未見佳刻己酉初春得此本紙墨頗佳卷尾王覺跋後有吳郡杜詩梓五字

而其上損數字當是書賈去其年月欲爲宋本耳然誤字不少鮑氏見之不免塵埃風葉之歎欲讀鮑注當參吳氏師道校注余僅有坊間合刻本堯圃所藏至正乙巳本拜經樓亦有之欲假未果曲阜孔氏刻本亦未得藏舊書難遇不必宋元刻也顧千里爲黃氏策札跋云欲放杜征南於左氏春秋之意爲戰國策釋例五篇一曰疑年譜二曰土地名三曰名號歸一圖四曰語訓微五曰大目錄儻有成書亦讀戰國策者不可少也附識以俟訪求

跋舊刻方輿紀要州域形勢說

四川龍氏新刻方輿紀要序文不著年月此州域形勢

說五卷續編一卷

明代

與新刻詳略不同凡例八則自署

康熙丙午與新刻亦不同末言方輿紀要凡七十二卷
今本則一百三十卷輿圖要覽四卷蓋康熙丙午後續
有增益而海防海運鹽漕屯收則終未別纂成書也有
志讀史者當先熟此數卷於歷代沿革了然胸中然後
研究全書證之諸史則輿地之學庶幾希蹤杜京兆王
浚儀爾此本凡例言助之稽采者有李滌庵譚趙月琴
駿烈鄧丹邱大臨范鼎九賀秦湘侯沅華商原長發新
刻無此文諸君子與景范先生爲友其學行必不苟附

誌其名以俟訪求撰著云

跋惺齋雜箸

吾鄉王惺齋先生讀韓記疑書肆有新印本祇平居士
集印本漸稀余廿年前求得之時一展誦真今之震川
也史記正譌見不全本未及購道光乙巳四月吳山書
肆遇塘棲勞君格檢此書示余六月乃得之史記三書
及漢書律志正譌皆完備後附歷代廟學考全集已收
與將樂諸生論邑志舛漏書則集中所無余方與海昌
諸君子脩輯志乘所言皆前事之師也七月廿九日識

儒林傳擬稿跋

此爲 國史館擬稿聞進 呈時出毛奇齡於文苑去
張惠言不知他有異同否句下夾注采輯書名則盡去
之矣數百里閒藏書家若莊芝階汪小米皆但有文苑
傳而無儒林自泰吉從從子寶甫鈔得此本乃始流播
其中亥豕之訛從兄雲壽嘗簽正數十條其未及者尙
當從采輯之書校正三十餘年未暇及此可愧可愧道
光乙巳十月七日識

文苑傳跋

嘉慶甲戌族子恬齋由翰林出守澂江過家上冢泰吉
鈔得儒林傳稿主其事者儀徵阮公恬齋亦與分纂也

文苑則尙未彙稿後數年於汪小米處見之潘梧君藹
人因借鈔其副昨歲梧君下世其冊歸唐氏泰吉乃屬
鍾署香潘稻孫爲鈔此本目錄前後失次似隨撰隨寫
者進 呈之本當不如是儒林傳進 呈時定本不得
見此傳不注書名則非初撰之稿然應列文苑之人似
尙未全當向館閣諸公訪求也道光乙巳十月七日識

甘泉鄉人稿卷五

甘泉鄉人稿卷六

嘉興錢泰吉輔宜

跋書經集傳校本

道光己亥秋日仁和邵蕙西孝廉懿辰見余曝書雜記知欲訪求鄒氏蔡傳音釋以明正統本書集傳借讀既鈔音釋於別冊乃以此本校核正文傳文他事間斷至庚子季夏四日甫畢讀舊書生記於海昌學舍

附錄異文

咸豐癸丑得見至正刻本亦附著異同

序二典禹謨坊本多誤作三謨朱子實止於禹謨正

統本不誤

元至正本作禹謨○後凡至正本與正統本同者不著

禹貢伊洛瀍澗既入於河傳云瀍水地志云出河南
郡穀城縣替亭北坊本替誤替 過九江至於敷淺
原傳引地志傳易山坊本易誤易 五百里荒服傳
云或以爲禹直方計坊本少爲字

湯誥弗忍荼毒傳如荼之苦如螫之毒坊本作如毒

之螫

元至正本作如毒
之螫與今本同

伊訓制官刑節傳文異時太甲坊本異時作當時

盤庚上盤庚敷于民節傳文蓋小民患渴鹵塾隘坊

本小作以

泰誓上惟十有三年春大會于孟津傳文尤爲無藝

坊本藝作義

更定武成篇末坊本傳文少百餘字正統本與

欽定傳說彙纂所錄同

洪範明作哲曰哲時燠若今本哲皆誤哲

至正本亦誤

金縢惟朕小子其新逆坊本逆誤迎

至正本作迎

史乃冊

祝節傳文以紓危急今本紓作輸

至正本傳文作輸音釋作紓

大誥王若曰猷大誥爾多邦傳文言我不爲天所恤

今本不作命

紹天明傳文以其可以紹介天明今

本明作命

酒誥又惟殷之迪諸臣惟工今本惟誤百

無逸自朝至于日中與今本與作昃

至正本作昃

周官司空掌邦土傳文主國空土今本空誤邦

康王之誥用端命于上帝傳文文武用受正命于天

今本作天下衍下字

至正本亦多下字

跋評點書經

舊藏書傳有前人評點蓋不信古文者三代文字豈易
窺測然文章根本皆在六經記考古圖當用顧命序遊
廬山當用禹貢王景文之語可類推也此評簡明淺近
可導初學乘暇錄之與往歲所錄潛采堂朱氏評點詩
經相配癸丑七月

跋影寫元至正重刊蔡傳凡例

道光庚子從仁和邵蕙西部郎懿辰假正統本書集傳錄鄒氏音釋閱十四年矣曾寄大梁請吾兄衍翁刻入經苑未幾吾兄下世不果蔣生沐光煦近得元至正辛卯雙桂書堂刊本擬借校一過忽忽未暇唐茂午孝廉兆榴適館余齋因倩摹重刊凡例一葉視元本不爽毫髮足與汲古閣影寫本韻頗矣蔡氏書傳雖三家村塾皆有之而窮經之士皓首不見音釋於蔡氏傳文襲俗沿誤者十蓋八九也生沐能倩人摹寫經傳及音釋依式授梓加以校勘俾家有隨和豈非盛事此葉則吾家

徑尺之璧也咸豐三年七月廿六日識于海昌城東寓廬

跋李金瀾所藏洪範正論 并錄李跋

此真初印庚申歲在志局從書賈購得家藏胡東樵禹貢錐指一部爲鄂巖比部所贈亦初印本也合訂此冊庶爲雙璧辛酉二月金瀾識

此梅會里李金瀾廣文遇孫藏本金瀾下世未久遺書多散此冊爲余所得以配陳聳澤曾所贈初印本禹貢錐指亦成雙璧李氏所藏錐指不知歸於何所書之聚散與金玉何異要當掇其菁英心有實得乃不爲慢藏

耳金闌承其大父敬堂先生之學與從兄薌沚自少專精經學出其餘緒成金石學錄括蒼金石志此書曾爲所藏亦可寶貴道光己酉四月

跋衛氏禮記集說

往歲癸卯徽州程木庵洪溥以通志堂經解寄贈余有詩記事并繪贈書圖以報木庵未幾木庵下世終未相見也木庵之贈經解以余曝書雜記有未得衛氏禮記集說語旣得集說竟未循覽木庵爲傷惠矣勉讀一過冀無負木庵耳他書未暇及也聞杭氏續禮記集說用活字板印成倘得收藏當取兩書精要爲禮記約義能

成與否不敢自必矣庚戌十月

跋重刻撫州公使庫本禮記

黃東發咸淳九年修撫州六經跋云撫州舊板惟六經三傳今用監本添刊論語孟子孝經以足九經之數見於日鈔後附刻文集又跋儀禮云淳祐九年本州初建臨汝書院時嘗模印入書閣則撫州儀禮當有兩刻不知他經若何今張氏所模刻禮記猶是淳熙四年初印本在黃氏修補前百年可寶也安得九經全本重刻以配岳氏荆溪家塾之本耶

跋仿岳本周禮

前數年得此於吳山書肆知爲明人仿岳氏本乃武英殿重刻五經外僅見之本也惜失刻書序跋中多缺葉道光戊申二月署知州上元朱述之明府得一本與此同因命炳森補寫缺葉刻書人序跋亦無之記此以俟異日述之云尙有儀禮禮記與此刻同余未得見

跋秦藩本史記

秦藩本史記有嘉靖十三年正月秦藩鑒抑道人序以明史諸王傳表攷之乃定王惟焯也序稱我簡祖呻吟佔畢以力學終其身則爲簡王誠泳傳稱誠泳孝友恭謹嘗銘冠服以自警建正學書院又於劾建小學擇軍

校子弟秀慧者延儒生教之親臨課試王府護衛得入學自誠泳始序言力學終其身蓋不誣云定王爲簡王從孫傳稱有賢行而不著事實序言景慕衛武以鑒抑名軒則信乎其有賢行矣抑亦簡王力學之遺風歟史記以千字文爲次自天至往凡二十冊殆欲全刻諸史故標識如此今僅見史記其版式與震澤王氏本同

跋史記志疑

梁曜北先生清白士集版尙完好此書則已斷爛久乏印本道光辛丑夏日得此初印本於吳山書肆余方校勘史公之書將奉此書及嘉定錢先生考異高郵王先

生雜志爲準繩焉王先生亦謂志疑所說有錢氏未及者而校正諸表特爲細密也

跋班馬字類

陸放翁跋前漢通用古字韻編云古人讀書多作文時偶用一二古字初不以爲工亦自不知孰爲古孰爲今也近時乃或鈔綴史漢中字入文辭中自謂工妙不知有笑之者偶見此書爲之太息書以爲後生戒 道光甲辰新正十日偶讀渭南文集錄此前漢通用古字韻編不知何人所撰視婁公書爲何如鈔綴古字入文辭固爲通人所笑然字之古今通假不可不知也 玉海

卷四十五引中興書目乾道九年陳天麟撰前漢通用
古文韻編五卷以四聲集之放翁所見當卽此書廿一
日記

覃懷李曾伯嘗爲婁氏補一千餘字景定甲子自序稱
隨其先君入蜀時與老儒王揆其成之見張氏金吾愛
日精廬藏書志李公稱婁公爲鄉先生蓋亦流寓吾禾
也蔣生沐有舊鈔本余嘗假錄於叢書樓所刻字類眉
間叢書樓一字一行視倪氏經粗樓本爲疎爽省目力
終以眼花不能多寫生沐已重刊補編尙未印行庚戌
十月記

跋舊本漢書

此爲十行本或謂宋刻然殷敬等字皆不避缺當是元刻明脩爾注文不刪勝明監本多矣其中脩版多訛字暇當校定之

是書爲我師特齋先生

諱爾琳道光辛巳秀水縣恩貢生於泰吉爲族孫

所藏

卷中圈點先生筆也先生下世未十年此書流轉書肆可慨已往歲嘗從先生假至海昌年來時憶此書庚戌九月偶至故里購得之如見先生口講指畫時也先生評點資治通鑑在硤石蔣寅昉處

重刻舊本書遇有缺葉以流俗本羈補柯氏王氏刻史

記皆不免此本多空格紙亦可見重脩者之審慎不苟也

跋通志二十略

鄭氏通志未得購藏架上所有者二十略耳且是乾隆十三年于金壇以明正德本重刻於浙江試院非舊本也然馬氏通考故事類錄通志略謂元無卷數止是逐略分爲一二耳中興四朝藝文志別史類載通志二百卷非此二十略也豈二百卷自爲一書亦名之曰通志或并二十略共爲一書耶當俟續考云云則馬氏亦未見通志全書也咸豐改元仲春之望偶檢經籍考錄之

以自文其弁陋

跋梅會里李氏評校日知錄示炳森

李香子明經錄其從祖敬堂老人評閱日知錄及何義門勘本道光己酉嗣君蒼雨贈余校經廬文集得讀跋文遂從蒼雨借本令炳森錄之明經讀此書自乾隆丙午至嘉慶乙丑閱二十年凡七過卷末標識歲月可見者如此晚年與余相見談及困學紀聞及此書必言其從祖所教若何余蓋數聞其緒論云前輩讀書謹守師傳終身不倦後學所當取法也咸豐元年二月炳森重裝此冊將攜之京師因錄明經跋語而識其後

跋文獻通考詳節示應溥

杜氏通典南宋時有爲詳節者 四庫提要謂略無義例蓋書坊所爲也然數百卷大書寒士不易得卽得之亦驟難卒讀詳節之本要亦不可少嚴氏此書誠足爲讀通考者沿流溯源之資曩從金岱峰借陸瓠尊丈閱本令應溥點讀今將攜之京師蓋欲窮源竟委則讀通考全書尙須參考諸史及唐宋人文集區區節鈔與兔園冊何異若曰亦旣從仕以吏爲師則此冊亦束置之耳嚴氏有詩質疑不知可訪求否

跋稽古錄校本

朱子在長沙所刻稽古錄自謂勝越中本當卽陳直齋
所稱潭本也潭本越本不可見世所通行者惟此本不
知何人所刻諸論各繫於國亡時似從潭本而脫誤頗
甚恐亦如趙氏刻歷年圖不免有所增損而傳寫之不
審則又甚焉咸豐壬子夏日養疴假許辛木戶曹楣及
兄子鬯醇閱本粗校一過兩本皆同此刻又從蔣生沐光煦假
昭文張氏學津討源本稍稍是正張氏本差善然若漢
武帝時脫天漢三年至征和二年事凡八年而以征和
三年四年事爲天漢三年四年張氏未及校正若唐太
宗貞觀二十二年遷安西都護於龜茲兼統于闐疎勒

□□

此刻空二字

謂之四鎮張本補碎葉二字是矣而前文

云阿史那社爾拔焉耆虜其王訶黎布失畢則以龜茲王爲焉耆王溫公元本必兼列焉耆龜茲二事而傳寫脫失張氏亦未及校正又若漢宣帝地節二年二誤三張氏旣改正矣而立許后子奭爲皇太子乃三年事今誤繫於二年而三年乃無事張氏亦未及校正他處類此者不可枚舉老年眼花臂痛史事不熟翻閱爲難尙望同志共爲校讐以成善本云七月十一日

跋呂氏童蒙訓

余求此書數十年不得見桐城蘇厚子有吾鄉朱先生

坤所錄本未及借鈔時時念之壬子四月得此康熙四十四年仿宋本於郡城書肆卽四庫所著錄而不知何人所刻此本幸有刻書人跋知爲吳江姚紉子舉也呂氏以訓童蒙而余年逾六十始得讀全編欲補小學工夫愧無及矣咸豐癸丑三月三日識

跋離騷草木疏辨證

離騷草木疏辨證四卷海昌祝芷塘侍御德麟預校四庫全書時以經進宋本吳氏所著書取永樂大典及五雅山海經淮南子齊民要術本草諸書詳校并附考證乾隆己亥刻成有跋管芷湘於鄉先哲著述寓目甚

廣前纂備志藝文僅據祝氏譜傳存此書名未見傳本也今見此冊始知辨證詳審足爲斗南功臣近地所刻書且屬親串之家而余與芷湘皆爲好事者前此數十年皆未得見按訪遺籍豈易事哉道光己酉十一月十七日湖州書估持售因識數語以示芷湘所纂海昌經籍攷急宜補錄跋文且未竟之緒尙多也

跋棠陰比事

四庫所收棠陰比事爲明景泰間吳文恪刪定本上元朱述之郡丞購得宋本重刊與余姍家許珊林郡守所刊折獄龜鑑並行治獄者可人執一編矣此爲郡丞所

贈初印本余假宋本命外孫桐鄉沈善經校對一過屬郡丞命工脩改郡丞欲續比事掇采已得數千條有因屬對難工欲舍去者余謂不若用吳文恪之意以事類排比成之不必拘於聲韻對偶致有遺棄也

跋蘇學士集校本

蘇子美集今所通行者僅有康熙年震澤徐氏刻本訛字不少夙聞馬二槎上舍有何義門校本今年四月蔣生沐乃假得畀余傳錄惜非義門元本卷尾署款云辛酉初秋韓江寓齋借馬氏所收義門原校本校改之字塗寫於本字之覆審世鈺但署名不著姓上諦審乃能辨其筆畫義門必不然也義門從石門呂

氏得見吳文定公叢書堂鈔本乃呂氏校定者乾道辛卯施元之刻於三衢之本義門亦未得見當訪求焉咸豐辛亥五月既望校至六月朔畢令外孫沈師濟錄義門從梁溪漫志補錄與歐陽永叔書及呂氏從舊本錄山谷詩施元之跋老年不能作楷書有愧先哲多矣

跋宛陵集

宛陵集余舊時但有殘本失其前四卷第六十卷僅存八葉皆古今體詩非四庫所收明姜奇芳本也此爲康熙壬午震澤徐氏刻本詩五十九卷文一卷記一首序一首賦十首後附拾遺僅詩二首雙羊山會慶堂記一篇與九首

四庫本亦不同辛亥九月楊柯亭爲余購於吳門老年得見全帙亦一快也十二月旣望得炳森都門書言於廠肆得道光庚寅宣城知縣梁中孚重刊康熙丁卯宛陵裔孫枝鳳所刻本爲詩五十九卷文十首爲第六十卷與此本又不同宛陵集屢經傳刻而余求之數十年不獲觀乃於數月間南北皆得之平生購書往往如此遇合之有時不可見耶

此書與蘇學士集同時所刻紙墨皆精譌字亦相若惜不得義門先生以舊本讐校暇日當略爲校正讀舊書生又識

跋司馬文正公集

嘉慶乙丑先府君養疴邸舍案頭常寘者司馬文正公集及鈔本陳氏九朝編年備要也及府君疾亟陳氏書不知何人取藏衍石兄每與泰吉言之同深歎惜文正集幸存乾隆五十五年徐水喬人傑平陽徐昆咸豐二年夏日重裝去府君下世已四十八年欲取傳家集舊刻校讀未能也

跋劔南詩集

前年兒子應溥得渭南文集今年七月下浣得劔南詩稿九月初桐鄉馮詒齋昌燕贈家世舊聞老學庵筆記

南唐書放翁所著略備矣暇當取竹汀宮詹所纂年譜錄於詩稿之首按次考核庶知放翁感時託詠亦南宋詩史也

先本生祖考安慶府君劇愛放翁詩案頭常置者汲古閣初印劒南集也所閱本不知今歸何人此本有上虞顧氏及桐鄉錢氏收藏印硃色圈點不知爲顧爲錢於鄙意不甚合也讀放翁詩當遵

御選唐宋詩醇參以羅澗谷劉須溪選本放翁眞面不爲流連光景之詞蒙翳晦塞詩家正脈庶幾不墜近人所習見者楊氏大鶴選本放翁許爲知音與否我不敢

知矣庚戌十月六日

跋宋文憲全集

集五十三卷卷首四卷嘉慶十五年嚴州知府吳縣嚴氏榮刻道光庚戌九月子仁姪攜贈爲余六十壽早歲思讀是集不可得僅從明文在中略觀大意今幸得此老矣不能尋繹也繼賢姪與子仁偕來以陳太夫人寫關帝像畀藏二十年前見於中錢懷德堂中今堂已毀矣老屋不足恃所賴舊書以延世澤爾霜降後一日記

跋歸震川集評本

往歲壬辰平湖方子春廣文垌示余其所評震川集并

錄吳江張鱸江評本余手寫數葉潘梧君茂才藹人見而喜甚爲錄終卷未幾子春下世每一展讀輒思故人今年假沈廉仲小湖侍郎仲子所藏盛秦川先生錄祇平居士評本梧君下世又有年矣鮮同嗜者忍寒錄焉祇平鱸江文集皆已刊行若仿詩家主客圖之例其於震川不愧上入室矣梧君文稿余亦傳錄惜乎未見其所止也子春晚歲潛心理學所作無多不知尙可收集否庚戌長至後一日

跋徐侯齋居易堂集

居易堂集二十卷余得藏刻本三十餘年矣有海甯陳

鱣小像印及吳騫讀過印蓋仲魚藏書而兔牀曾借閱者頃見顧千里思適齋集跋侯齋與楊潛夫札子云居易堂集失傳於世并尠知其名者乃知此集雖侯齋同郡後人好事若干里者亦未見也則其他所論著若通鑑紀事類聚廿一史文彙建元同文錄讀史稗語讀史雜鈔管見諸書序文雖見於集中世亦不得而見之矣侯齋高風亮節不必以詩文傳而其文峻潔如其爲人集首有目次凡例十一則亦編輯文集者所宜取則也世尠得見而余見之獨早藏之有年又不能力爲之傳使世之知侯齋者獨於山水竹石可嘆也已庚戌七月

七日識

辛亥重午後一日遇吳門顧湘舟於吳山言居易堂集藏書家多有之淵薈專心古籍於鄉先哲著述轉多未見耳

跋瀛奎律髓評本

二馮評瀛奎律髓衍石齋有錄本極精未得細讀查初白選者向於坊中得過錄本令炳森鈔出全首及摘聯以便諷誦紀文達評蘇詩可爲詩家圭臬此評於虛谷二馮閒多持平之論因以查氏所選標於卷中兩家雖時有不同參酌觀之律詩三昧在是矣乙巳九月四日

記

昨冬沈廉仲贈鏡煙堂曉嵐評著十種有刪正瀛奎律髓四卷僅錄所選取者評語亦有異不若此刻爲全備也咸豐辛亥三月五日記

辛亥八月六日始錄初白評於文達刊誤本上以便覽誦閱閏月至九月二日畢余未有初白評本時潘伊人翁爲誦梅聖俞欲雪詩第二首謂初白但圈一句試揣之以爲第幾句余曰必第七句都無少年意也伊翁曰然此語二十餘年矣今過錄查評漫記之以見持論趨向雖各有所指歸而其大旨自具準的也

跋古文辭類纂

道光丁亥夏日初至海昌前東防同知陽湖呂幼心先生榮已罷官以公事畱余得遊其父子間承次飴二兄抱安贈此十餘年來時時翻閱辛丑秋日重裝因記

吳仲倫初至余齋與銘恕論文事曰曾見古文辭類纂乎曰見之仲倫喜謂余曰是不愧君家子弟矣蓋余案頭日置是編兒曹常見余諷誦故有以答客問耳其中精蘊余固未能窺況若曹耶然文章體裁亦略能知之今仲倫云逝客來問古文辭者實鮮其人書此誌感癸卯長至後九日

跋強恕齋詩稿 二則

秀水張浦山先生強恕齋詩鈔四卷爲嘉興知縣豐潤魯公克恭選刻此其稿本也先生與文端公總角交稿藏壽萱堂泰吉於舊櫝中得之有年矣道光丁未爲白蟻所蝕屬管芷湘脩補重裝芷湘畫山水服膺浦山先生故不惜日力如此詩鈔文鈔刻本亦同時所脩補也魯公選刻詩鈔爲乾隆壬申此稿至乾隆壬戌止蓋在刻詩前十年全稿尙夥不可得見矣魯公序謂鈔先生詩與楚攸彭君湘南及己之作並付梓人兩家之詩今亦不得見強恕齋文六卷則乾隆丁丑吳興太守沔陽

李公堂訂鈔付梓先生年七十有三

跋彭秋士集

宜興吳仲倫數稱彭秋士文簡質余求其集不可得一日與金岱峰會於武林言近見長洲彭君詩文集非時人語也予知之乎余曰必彭續秋士也岱峰曰然乃遣足至臨安學舍取以贈余潘梧君藹人借鈔一本他人不耐卒讀也道光丁未檢書匱爲白蟻所蝕屬管芷湘脩補重裝仲倫梧君下世已有年他日晤岱峰當共讀之

跋歸安沈觀察

榮昌

成志堂集

泰吉已孤更名世父所命也表伯歸安沈舫西先生琨
本生祖母太恭人之姪也嘉慶丁卯來視世父一日笑
語世父曰我泰安守當爲泰吉字因字之曰輔宜先生
官御史時嘗劾江蘇大吏虐辱生員直聲振一時守郡
廉告歸貧甚以吟詠自適先府君宰京縣時先生適爲
諫官往來甚密故尤愛泰吉云先生全稿未得見先生
父省堂觀察公成志堂詩集十四卷外集一卷先生所
手授者暇日檢讀憶舊事附識於後觀察尙有居官內
省錄衍石兄刻於河南咸豐壬午首夏

甘泉鄉人稿卷六